

Date – 17/12/2025  
Time - 7:30 -7:40 Hrs  
AKASHVANI AIZAWL

## REGIONAL NEWS BULLETIN

### HEADLINES (MORNING)

1. Health Minister Pi Lalrinpuii'n Mizoram Universal Health Care Scheme hnuaiyah damlo mi 59,602 enkawlina senso cheng vbch 100 chuang pekchhuah a ni tawh tih a sawi.
2. RD Minister Prof. Lalnilawma chuan Mizorama a hmasa ber ni turin ni zung chakna hmang "Solar Market Shed" chu Seling leh Keifangah a hawng a, Saitual Rubber chingtute hnenah an hnathawhnaa hman tur Solar Light a pe bawk.
3. Prime Minister Narendra Modia chuan ni 2 cham turin nimin tlai khan Ethiopia khawpui Addis Ababa a thleng
4. Nimin Lok Sabha-ah Mahatma Gandhi National Rural Employment Guarantee Act, 2005 (MGNREGA) thlakna tur bill putluh a ni.

<><><>

### HEALTH MINISTER

Health Minister Pi Lalrinpuii'n Mizoram Universal Health Care Scheme hnuaiyah damlo mi 59,602 enkawlina senso cheng vbch 100 chuang pekchhuah a ni tawh tih a sawi.

Nimin khan a pisa-ah chanchinbu mite kawmin Health Minister chuan, kumin sorkar tangka kumthar April ni 1 atanga December ni 16 inkarah Mizoram Universal Health Care Scheme hnuaiyah damlo mi 59,602 enkawlina senso cheng vbch 100 chuang sen ral ani tawh a ti a, Mizoram Universal Health Scheme in senso a tumsak damlo zinga 68.56% chu sawrkar damdawiina enkawl an ni a ti.

Pi Lalrinpuii chuan MUHCS chungchangah Private Hospital thenkhat zingah Mizoram sorkar thawpui tum an awm mek thu sawiin thawhhona tur thuthlung pawh ziah fel a nih tep tawh a ti a, Kohhran hrang hrang Damdawiin te pawhin mipui rawngbawlina a ni tih hria a health care chungchangah sorkar hmalakna an rawn zawm chu a lawmawm atih thu a sawi.

Health Minister chuan Mizoram chhunga district hospital hrang hrang an lun thu leh Civil Hospital, Aizawl chu a khat reng a ti a. Zoram Medical College & Hospital chu khum 520 nei thei tura tihlen a nih bakah, Cabin pindan 40 pawh damto te tana peih fel a nih thu te a sawi bawk.

Health Minister chan Kal thlak (Kidney Transplant) pawh Mizoramah a tih theih dawn hnai tih sawiin, Civil Hospital, Aizawl-a Operation Theater te pawh buatsaih fel a ni tawh tih a sawi a, Aizawl Smart City Ltd atangin Anaesthesia Work StaHon bakah hmanraw tul ang ang pek an ni tawh tih a sawi bawk a ni.



## YMA ROAD MONITORING TEAM

Central YMA Road Monitoring Team te chuan nimin khan an President Pu. R. Lalnggheta hoin Kawnpui leh Sihphir inkar kawng Black Topping hna thawh mek an en.

Helai kawng hi BRO hnuai a contractor BRN infrastructure Private Limited ten an thawk a. Road monitoring team te hi Sihphir, Lungdai, Sentlang, Serkhan leh Zanlawn Branch YMA ten an lo tawiawm.

Central YMA Team te chuan kawng siam mek hian duhthu a sam lo hle niin an hmu a, an kawng siam pawh hi a tha lo hle niin an hmu bawk. BRO leh Contractor te chu tha tak a siam tur in an hrih a. Sihphir leh Kawnpui inkara Branch YMA te pawh an huam chhung ah tha tak vil turin an chah bawk. BRO Chief Engineer leh Contractor te chu tunkar Zirtawpni hian CYMA Office ah leng turin an ko a ni.



## RD&A MINISTER

RD Minister Prof. Lalnilawma chuan Mizorama a hmasa ber ni turin ni zung chakna hmang “Solar Market Shed” chu Seling leh Keifangah a hawng a, Saitual Rubber chingtute hnenah an hnathawhnaa hman tur Solar Light a pe bawk.

Nimina hun hmanah Prof. Lalnilawma chuan, SELCO Foundation leh MLA fund hmanga Solar Project tihpuitlin a ni thei chu lawmawm a tih thu sawiin, sawrkarin khawtlang tan leh kuthnathawktu te tana tangkai tur ni zung hmang, project tluan tling, siam chhuah kawngah theih tawp chhuaha hma lak zel an tum thu a sawi bawk.

Minister chuan chawhmeh zuar tute chuan ni zung chakna hmangin chhunah inchhem daih nan fan an hman theih bakah zanah eng an chhi thei tawh dawn tih a sawi a, bazarah zan rei tak tak thleng an thut theih tawh dawn avangin an eizawna kawngah pawh hma an sawn phah a beisei thu a sawi.

Prof. Lalnilawma chuan Saitual Rubber Producer Society te pawh an Solar light chuan an hnathawhna lamah nasa taka a puih mai bakah, rubber thar chhuah kawngah pawh hma an sawn ngei a beisei thu a sawi a, heng Solar light te hi dimdawi tak leh uluk taka enkawl tur leh tangkai taka an hmang turin a chah nghal a ni.



## SUPPLY MINISTER

Mizoram Consumers’ Union Headquarters buatsaihin nimin khan Venghluia Central Hall-ah 28th Annual General Meeting-cum-Consumer Awareness Campaign neih a ni a, he hun hi Supply Minister Pu B. Lalchhanzova’n a hmanpui.

Khuallian Minister chuan Consumers’ Union hmalakna chu phungthlu taka hlenchhuah chi a ni lova, hawihhawm tak chung a thil ti dik lo te hremna pek ngam a tul a, an hnathawh hlutna chu mual eng kil pha lo, sawi saktu nei ve lo ten a parzu an chhim pha tur a ni, a ti a. Cosumers ten an chanvo diktak an chan thatna hmun zoram din tum tura palai kalkhawmte fuihin, kan hnathawh an hlenchhuah hian Pathian rawng an bawl a ni tih hre turin a chah bawk.



## KUMPUAN KICKOFF

Sub Hqrs. YMA, Saitual chuan YMA Kumpuan Ruihhlo Do chu nizan khan Keifanga YMA Zawlbukah an nei a, CYMA General Secretary Prof. Malsawmliana chuan a hawng a ni.

Kumpuan hawngtu Prof. Malsawmliana chuan, Krismas hmaa Sub. Hqrs YMA Saitual-in Kumpuan, Ruihhlo Do an hawng thei chu lawmawm a tih thu a sawi a. Ruihhlo hman sualah Mizote an tawh thu sawiin, kumin bikah Ruihhlo avanga thi 80 chuang an awm tawh a, heng bakah thil tha lo lama Mizotean sang chu a zahthlak a ni a ti.

CYMA Secretary chuan Ruihhlo Do turin YMA lo chu an awm chuang lo a, Ruihhlo Do an puan avangin Mizo mipui bakah Sawrkar leh pawl hrang hrang te an phurin a hria a, a lawmawm tak zet a ni, a ti. Ruihhlo Do an puannaah hian Haw haw a nawr chi a ni lo a, fimkhur a ngai a, dan hnuaiyah an do a ngai tih sawiin, Ruihhlo an do hian ruihhlo ngaite chauh en bik lovin ruihhlo a sumdawng te leh inhnamhnawihte pawh an hmachhawn a tul tih a sawi bawk.

Prof. Malsawmliana hi CEC atangin Pu Zoramthara, Pu PC Lalthanhlira leh Pu Ngurthansanga ten an tawiawm a ni.



## SPORTS MINISTER

Sports & Youth Services Minister Pu Lalnghinglova Hmar chuan Chess chu khawvel huap pawha India hmingthatna leh ropuina a ni tih a sawi.

Sports Minister hian nimin khan R. Dengthuama Indoor Stadium, Mualpuiah India Hmarchhak bial chhunga Chess intihsiakna lian ber, 23rd NE States Chess Championship a hawng a, he hunah India hmarchhak States hrang hrang atangin Chess khelthiam te an rawn kal khawm a ni.

Pu Lalnghinglova Hmar chuan, Chess chu khawvel huap pawha India hmingthatna leh ropuina a ni tih sawiin, Mizoram leh Northeast state dangte pawhin ‘popular sports’ chauh ni lovin, khawvela an lan theihna chess chu uar zual zel tha a tih thu a sawi a. Chess chu game zahawm tak a nih piahlahmah dawhtheihna zirtirtu tha tak a ni a. Social media khawvel hmanhmawh tawh tak, thalaite attention span pawh tawite a nih tawhna khawvelah chess khelh chu rilru hriselna atan pawh a tha hle a ni, a ti bawk.

23rd NE State Chess Championship-ah hian India Hmarchhak State hrang hrang atangin infiammi 280 an tel thei dawn a. Championship hi Mizoram in a thlen wawi hnihna niin, tun tumah hian ni li (4) chhung khelh tur niin December ni 20-ah a tiak ang.



## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



## APEX BANK KRISMAS PRESENT

Mizoram Cooperative Apex Bank Ltd. chuan Krismas dawna an tih thin angin Krismas pual thilpek; TNT, Muanna Vengah cheng nuaih khat sing nga an hlan a, Operation Kingdom Ministry (OKM), Hermons Children Home, leh Cancer Khualbukah cheng sing nga theuh an hlan bawk.

Apex Bank hian District hrang hrangah Branch kal tlangin miharsate tan Krismas pual thil pek an hlan bawk a. Chairman Pu Lalnunsanga leh CEO Pu A. Lallungmuana ten Krismas Chibai bukna thilpekte hi an hlan a ni.

Thilpek Hlanna hunah hian Senior Officer ten Chairman leh CEO te hi an tawiawm a. Apex Bank Chairman chuan "Krismas chu Mizo te hunpui ber a ni a, he huna 'sem sem dam dam, ei bil thi thi' tia duhsakna kan inhlan thin hi, a Mizo Kristian hle a ni" a ti.



## PM

Prime Minister Narendra Modia chuan ni 2 cham turin nimin tlai khan Ethiopia khawpui Addis Ababa a thleng a. A cham chhungin Ethiopia PM Dr.Abiy Ahmed Ali nen India leh Ethiopia thawhdunna hrang hrangte an sawidun ang. Tun tum hi PM MODian Ethiopia a tlawh vawikhatna a ni a. Vawiinah Ethiopia Parliament ah thu a sawi dawn bawk a ni.

Nimin khan Prime Minister Narendra Modia leh Jordan Lal King Abdullah II te chuan India-Jordan business forum, Amman ah an hmanpui a. Hruaitu pahnihte hian ram pahnih thawhdunna kaltlanga ram eibar hmasawanna tur ruahmanna hrang hrang an puang a. He hunah hian ram pahnih atangin sumdawng lian aiawhte an tel a. Leitha siamna lamahte, textile lamahte leh energy thianghlim siam chhuah kawngahte, information technology leh health sector lamahte thawhhona tur an sawiho a ni.

Prime Minister Modia chuan thusawiin India-Jordan inlaichinna chu a danglam bik tih sawiin hman ata tawh inrintawna a awm thu leh eibar zawna kawngah hmalam hun thui tak an thlir tih a sawi bawk a ni.

Business forumah hian thawhdunna tur inremna chi hrang hrang an ziak a.

Hemi hnu hian PM Modia hian Ethiopia a tlawh zawh hian Oman a pan le hang.



## MNREGA

Nimin Lok Sabha-ah Mahatma Gandhi National Rural Employment Guarantee Act, 2005 (MGNREGA) thlakna tur bill putluh a ni. He bill hi a hmingah Viksit Bharat-Guarantee for Rozgar and Ajeevika Mission (Gramin) Bill,2025 tia vuah a ni a. Union Agriculture Minister Shivraj Singh Chouhan chuan bill hi house ah a pulut a. Thusawiin tunlai dan thar nena her rema Viksit Bharat 2047 nena kal dunin dan thar siam an tum a ti a. He dan tharah hian thingtlanah kum khatah ni 125 inhlawhna tur siam a ni ang a ti a. Prime Minster Narendra Modia kaihhruaina hnuaiyah mi retheite dawmkanna turin welfare scheme hrang hrang siam a ni a ti bawk.